

共同經課 - 1 耶利米書十八章一節~十一節

1 耶和華的話臨到耶利米講：2 「你起來，落去燒磁人的厝，我佇遐欲互你聽我的話。」3 我就落去燒磁人的厝，抵當伊用輪啲轉，做伊的工。4 燒磁人用土做的器具，佇伊的手若歹去，伊就用彼塊土另外做別號的器具；照燒磁人所看做好的來做伊。5 耶和華的話就臨到我講：6 「耶和華講：以色列家啊，我款待恁，豈袂會親像此個燒磁人的所做嗎？以色列家啊，土佇燒磁人的手中怎樣，恁佇我的手中亦是按呢。7 我甚麼時論到一族抑是一國講，我欲給伊拔起來、給伊拆毀、給伊毀壞；8 我所講的彼一族，若反悔離開伊的歹，我就欲退悔，所想欲降互 in 的災禍。9 我甚麼時論到一族抑是一國講，欲建立，欲栽種；10 in 若行我看做歹的事，毋聽趁我的話，我就欲退悔，我所講欲互 in 的福氣。11 今你著給猶大人及倚起耶路撒冷的百姓講：『耶和華按呢講：我備辦災禍攻擊恁，亦設計謀攻擊恁。恁逐人著越頭離開伊的歹路，改正恁的所行恁的所做。』

共同經課 - 2 詩篇一百三十九篇一節~六節，十三節~十八節

1 [大衛的詩，交互樂官。] 耶和華啊，你已經鑑察我，識我。2 我坐落去，我緝起來，你攏知；你對遠遠知我的念頭。3 我行路，我倒佇眠床，你攏詳細知；我一切所行的，你也深知。4 耶和華啊，我的嘴所講的話，你無一句毋知。5 你佇我的前後圍我，按手佇我的頂面。6 此款的知识奇妙，我袂會測度，真高，我袂會到。13 因為我的臟腑是你所創造的；我佇老母的腹肚內，你有庇佑我。14 我欲感謝你，因為我受造，奇妙通驚；你的所做奇妙，這是我的心深知的。15 我佇暗中受造，佇地的真底受聯絡；彼時，我的形體無隱瞞佇你。16 我未成形的體質，你的目調已經看見；所定著的日，猶未有一日，攏記佇你的冊。17 上帝啊，你的意思對佇我到即寶貝！彼個數額到即多！18 我若欲算伊，比海沙卡多；我困精神的時，猶原及你相及佇啲。

共同經課 - 3 腓利門書一節~二十一節

1 願恩典及恁眾人相及佇啲！2 做基督耶穌的囚犯保羅，及兄弟提摩太批寄互阮所疼同著磨的腓利門，3 及姊妹亞腓亞以及及我同當兵的亞基布，及聚集佇你的家的教會。4 願恁對咱的父上帝及主耶穌基督得著恩典、平安！5 我常常感謝我的上帝，佇我祈禱的中間數念你；6 因為聽見你的仁愛及你所有的信，就是向主耶穌及顯出佇眾聖徒的。7 願你的信的相通有功效，通深知恁中間萬項的好來歸佇基督。8 兄弟啊，我為著你的仁愛，大歡喜，大安慰，因為聖徒的心對你得著安息。9 所以我雖然佇基督有通好膽將所合宜行的吩咐你，10 獨獨因為相疼的緣故寧可求你，我就是年老的保羅，現今也為著基督耶穌來受關監，11 我為著我的子，就是我佇掛鐵鍊的時所生的阿尼西謀來求你。12 伊前無利益你，現今就做你我的利益。13 我有差伊閣倒去你遐；此人就是我的心腹。14 我本愛留伊及我住，通佇我為著福音掛鐵鍊的時替你服事我。15 總是未知你的意思，我就毋愛做甚麼，是欲互你的好毋是出佇勉強，是出佇甘願。16 因為伊暫時離開你，豈採是欲互你通永遠得著伊，17 毋是猶原做奴僕，是贏過奴僕，就是做所疼的兄弟。我實在看伊做按呢，何況伊是你家內的人！閣是屬佇主的，豈無閣卡疼伊嗎？18 所以你若掠我做同伴，著接納伊，親像接納我。19 伊若有剋虧你，抑是欠你甚麼，通算我的數；20 我保羅親手寫，我欲坐額。免我給你講，你所欠我的是你本身的生命。21 是啦，兄弟啊，互我佇主對你得著歡喜，互我的心佇基督得著安息。

共同經課 - 4 路加福音十四章二十五節~三十三節

25 多多人及伊同行。伊就越過來對 in 講：26 「若有人就近我，也無怨恨伊的父母、某子、兄弟、姊妹，以及家己的生命，就袂會做我的學生。27 無夯家己的十字架來隨我的，也袂會做我的學生。28 恁中間甚麼人欲起塔，豈無代先坐啲，來算彼個所費，看會起到成袂？29 驚了豈採下地基，也袂會起到好，就看見的人攏恥笑伊，講：30 『此個人有動工，也袂起到好。』31 抑是甚麼王出來欲及別個王交戰，豈無代先坐啲參謀，看會用一萬兵抵敵彼個導二萬兵來攻擊伊的抑袂？32 若袂，就趁伊猶遠，差使者去及伊講和。33 按呢，恁中間見若無放揀一切所有的，袂會做我的學生。」